

10-bob. Reimport

58-modda. Reimport bojxona rejimi

Reimport bojxona rejimi shunday rejimki, bunda ilgari bojxona hududidan olib chiqilgan tovarlar bojxona bojlari, soliqlar to'lanmagan va iqtisodiy siyosat choralari qo'llanilmagan holda, ushbu Kodeksning [59-moddasida](#) belgilangan muddatlarda bojxona hududiga qaytarib olib kiriladi.

Reimport bojxona rejimiga joylashtirilgan tovarga erkin muomalaga chiqarilgan tovar sifatida qaraladi.

Qisman yoki boshqa tarzda shikastlanishlari bo'lgan, shikastlanish chog'ida holati yomonlashgan tovarni reimport bojxona rejimiga joylashtirishga bu holat avariya yoki yengib bo'lmaz kuch ta'siri oqibatida ro'y berganligi tasdiqlangan taqdirda yo'l qo'yiladi.

Tovar reimport bojxona rejimiga joylashtirilguniga qadar uni normal holatda saqlab turish bo'yicha turli operatsiyalar, shu jumladan mayda ta'mirlash operatsiyalari va texnik xizmat ko'rsatish, bundan tovarni kapital ta'mirlash va modernizatsiya qilish mustasno, amalga oshirilishi mumkin va ular tovar qiymati oshib ketishiga olib kelmasligi kerak.

Tovarni reimport bojxona rejimiga joylashtirish ushbu Kodeks [21-bobining](#) qoidalariga muvofiq bojxona organi tomonidan beriladigan ruxsatnoma asosida amalga oshiriladi.

Bojxona hududidan tashqarida qayta ishlash bojxona rejimida turgan tovarni reimport qilish tovarni reimport bojxona rejimiga joylashtirishga ruxsatnoma olinmagan holda amalga oshiriladi.

Tovar reimport bojxona rejimiga joylashtirilgan taqdirda tovarning amalda reimport qilinayotgan qismiga nisbatan tovar eksport bojxona rejimida bojxona hududidan olib

chiqilayotganda to'langan bojxona bojlarining va soliqlarning summalarini qaytarish, bosharti tovar mazkur tovarni olib chiqqan shaxsning ayni o'zi yoki uning huquqiy vorisi (merosxo'ri) tomonidan olib kirilayotgan bo'lsa, ushbu Kodeksning [49-bobida](#) nazarda tutilgan tartibda amalga oshiriladi.

Tovar reimport qilinayotganda tovarni olib o'tayotgan vakolatli shaxs to'lovlar sifatida olingan yoki tovar bojxona hududidan olib chiqilayotganda berilgan boshqa imtiyozlar natijasida olingan summalarni qonun hujjatlarida belgilangan tartibda qaytaradi.

59-modda. Tovarni reimport bojxona rejimiga joylashtirish talablari va shartlari

Tovarni reimport bojxona rejimiga joylashtirish quyidagi talablar va shartlarga rioya etilgan taqdirda amalga oshiriladi:

tovar bojxona hududidan olib chiqilayotganda u shu hududda erkin muomalada turgan tovar maqomiga ega bo'lishi lozim;

tovar uni olib chiqish uchun mo'ljallangan tegishli bojxona rejimiga joylashtirilgan paytdan e'tiboran uch yil ichida, vaqtincha olib chiqilgan tovarga nisbatan — vaqtincha olib chiqishning belgilangan muddati ichida, tovarning bojxona hududidan tashqarida qayta ishlangan qoldig'iga nisbatan esa — qayta ishlashning belgilangan muddati ichida reimport bojxona rejimiga ma'lum qilinishi kerak. Bunda bojxona chegarasi kesib o'tilgan kun tovarni olib kirish sanasi hisoblanadi, tovarni olib chiqish uchun mo'ljallangan tegishli bojxona rejimi uchun bojxona yuk deklaratsiyasi rasmiylashtirilgan kun esa, olib chiqish sanasi hisoblanadi;

tovar tabiiy eskirish oqibatidagi yoxud tashishning, saqlashning yoki foydalanishning (ishlatishning) normal sharoitlarida kamayishi oqibatidagi o'zgarishlarini istisno etganda o'sha holatida bo'lishi kerak;

bojxona organlari tomonidan tovarni identifikatsiyalashni amalga oshirish mumkinligi.

Tovarning faqat bir qismi qaytarib olib kirilgan taqdirda ham ushbu moddaning [birinchi qismi](#) talablariga rioya etilishi sharti bilan uni reimport bojxona rejimiga joylashtirishga yo'l qo'yiladi.

Ilgari eksport bojxona rejimiga muvofiq olib chiqilgan tovarni reimport bojxona rejimiga joylashtirishga bir vaqtning o'zida quyidagi shartlarga rioya etilgan taqdirda yo'l qo'yiladi:

kontraktning (shartnomaning, kelishuvning) shartlari bajarilmagan bo'lsa;

tovardan bojxona hududidan tashqarida foydalanilmagan va u ta'mirlanmagan bo'lsa, bundan tovarning qaytarilishiga sabab bo'lgan nuqsonlarni yoki boshqa holatlarni aniqlash uchun tovardan foydalanish zarur bo'lgan hollar mustasno;

tabiiy eskirishi hisobga olingan holda tovar o'zgarmas holatda turgan bo'lsa, bundan nuqsonlar aniqlangan hollar mustasno.

60-modda. Tovarni reimport bojxona rejimiga joylashtirish uchun zarur bo'ladigan hujjatlar

Tovarni reimport bojxona rejimiga joylashtirish uchun deklarant bojxona organiga bojxona yuk deklaratsiyasini va tovarning kuzatuv hujjatlarini taqdim etadi.

Ruxsat etish xususiyatiga ega tegishli hujjatlar bo'lgan taqdirda reimporti amalga oshiriladigan tovarlarga nisbatan

bojxona organlarining axborot tizimida bunday hujjatlar mavjudligini bojxona organi mustaqil ravishda tekshiradi.